

<><><><><><>

Headlines

- श्रीनगर च पानी सरबन्धी खेड्डें आहला खेलो इंडिया वाटर स्पोर्ट्स फेस्टिवल अज्जा थमां शुरू, 36एं राज्यें ते केंद्र शासित प्रदेशें थमां 500 शा मती खडारी बक्ख-बक्ख खेड्ड मकाबलें च हिस्सा लैडन।
- लोकसभा ते राज्यसभा दी कार्यवाही गी अज्ज अनमित्थे समें लेई स्थगित करी दिता गेआ।
- राज्यसभा दी मंजूरी दे कन्नै गै अज्ज संसद नै ऑनलाइन गेमिंग ते विनियमन बिल गी पास करी दिता ऐ।
- केंद्री मंत्री डॉ. जतिंद्र सिंह होरें आखेआ ऐ जे कम्प्यूटर राएं कायम कीती जाने आहली रेलवे दिएं टिकटें च उधमपुर दा नांs जेड़ा गलती कन्नै खुंजी गेदा हा, उसी परतियै लिखने दी बवस्था करी दिती गई ऐ।
- मौसम विभाग नै औंदी 23 थमां 26 अगस्त तोड़ी जम्मू-कश्मीर दे केईं सारे हिस्सैं च भारी बरखा दी पेशगोई कीती ऐ जेदे चलदे चानचक्क हाड़ औने दा खतरा बी बनी सकदा ऐ।

<><><><><><>

Water Sports Festival

3 दिनें दा खेलो इंडिया पानी आहली खेड्डें दा महोत्सव श्रीनगर दे ऐतिहासिक डल झील च संझा शुरू होआ जेड़ा शनिवार 23 अगस्त तगर चलोग। स्पोर्ट्स अथारिटी ऑफ इंडिया ते जेएण्डके स्पोर्ट्स काउंसल आसेआ सांझे तौरा पर आयोजित इस आयोजन दी परिकल्पना जम्मू-कश्मीर दी समृद्ध संस्कृति दे जश्न दे तौरा पर कीती गई ऐ। 36 राज्यें ते केंद्र शासित प्रदेशें थमां आए दे 500 शा मते एथलेटिक्स, रोविंग, कोचिंग ते कायाकिंग जनेह खेड्डें च हिस्सा लै करदे न। इस खेड्ड महोत्सव च वाटर स्कीइंग, ड्रैगन बोट ते शिकारा रेस जनेह कार्यक्रम बी होडन। युवा मामलें दे केंद्री राज्यमंत्री रक्षा निखिल खडसे, जम्मू-कश्मीर दे उपराज्यपाल मनोज सिन्हा ते मुखमंत्री उमर अब्दुल्ला होर श्रीनगर दे शेर-ए-कश्मीर अंतरराष्ट्री कन्वेंशन सेंटर च इस महोत्सव दे उद्घाटन समारोह च शामिल होए।

<><><><><><>

Parl. Sine Die

लोकसभा ते राज्यसभा दी कार्यवाही अज्ज अनमित्थे समें लेई स्थगित करी दिता गेआ। संसद दा एह बरसांती आहला इजलास जंदे म्हीने दी 21 तरीक गी शुरू होआ हा। अज्ज दपैहरी पैहली बारी स्थगित होने दे बाद जिसलै लोकसभा दी बैठक फी लग्गी तां स्पीकर ओम बिरला होरें दस्सेआ जे इजलास दुरान 14 सरकारी बिल पेश कीते गे हे ते कुल 12 बिलें गी पास कीता गेआ। उनें दस्सेआ जे इस इजलास दुरान आपरेशन सिंदूर पर द'ऊं दिनें दी विशेष चर्चा बी करवाई गई जेड़ी प्रधानमंत्री नरेंद्र मोदी हुं'दे परते कन्नै सम्पन्न होई। स्पीकर होरें इब्बी जानकारी दिती जे लोकसभा च भारत दे अंतरिक्ष प्रोग्राम दी उपलब्धिं बारे बी इक्क विशेष चर्चा कीती गई। श्री बिरला होरें सदन दे कम्मै-काजै च बार-बार पेदे विघ्न करी होए दे कीमती समें दे नुकसान पर नाखुशी बी प्रगट कीती। उनें आखेआ।

<><><><><><>

Online-Gaming bill

संसद नै ऑनलाईन गेमिंग ते विनियम बिल-2025 गी पास करी दिता ऐ। लोकसभा ते राज्यसभा, दौनें इसी मंजूरी देई दिती ऐ ते एह बिल हून कन्नू बनी जाग। एह बिल ई-स्पोर्ट्स ते ऑनलाईन सामाजिक खेड्डें गी बढ़ावा दिन्दा ऐ ते हानिकारण ऑनलाईन धन-सरबन्धी गेमिंग सेवाएं उप्पर रोक लांदा ऐ। एहदे च ऑनलाईन गेमिंग प्राधिकरण नियुक्त करने दा प्रावधान ऐ, जेड़ा क्षेत्र दे नियामक पर्यवेक्षण, नीतिगत सहयोग, रणनीतिक विकास ते विनियमों दी दिक्ख-रिक्ख करोग। एह बिल लोकें खास करियै, युवाएं गी इयै जनेही खेड्डें दे माड़े असर थमां बचाने आस्तै बनाया गया ऐ। पैसे सरबन्धी ऑनलाईन गेमिंग कन्नै जुड़े दे कन्नू दी खलाफवर्जी करने पर त्र'ऊं बरें तगर दी जेल ते 1 करोड़ रपे जुर्माना जां फी इनें दौनें दा गै प्रावधान रक्खेआ गेदा ऐ।

<><><><><><>

Online Gaming

मुख्य भरै आहला लेखा जम्मू-कश्मीर दे बसनीकें दी ऑनलाईन गेमिंग बिल-2025 गी संसद दी मंजूरी थहोने दा स्वागत करदे होई इसी इक्क प्रगतिशील गै'स करार दिता ऐ जेड़ी युवाएं दी उर्जा गी रचनात्मक कम्में च लाने च मदाद करोग। मकामी लोकें बिश्वास जताया ऐ जे एह बिल बड़ी तेजिया कन्नै बधा करदे ऑनलाईन गेमिंग सेक्टर च पारदर्शिता, जवाबदेही ते सुरक्षा यकीनी बनाने दे कन्नो-कन्नी युवाएं लेई नमें मौके बी पैदा करोग। विद्यार्थिं दे माता-पिता ते शिक्षकें बी इस्सै चाल्ली दे बिचार सांझे करदे होई आखेआ ऐ जे इस नमीं बवस्था कन्नै युवाएं अंदर ऑनलाईन गेमिंग दी लत ते एहदे माड़े इस्तेमाल गी रोकने च मदाद मिलोग। किश मकामी बसनीकें इस बारे अपनी प्रतिक्रिया सांझी करदे होई आखेआ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बशकार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Jitender Udhampur Railway Station

केंद्री मंत्री डॉ. जतिंद्र सिंह होरें अज्ज एह ऐलान कीता ऐ जे कम्प्यूटर राएं कायम कीती जाने आहली रेलवे दिएं टिकटें च उधमपुर दा नांs जेड़ा गलती कन्नै खुंजी गेदा हा, उसी परतियै लिखने दी बवस्था करी दिती गेई ऐ। सोशल मीडिया दी इक पोस्ट च डॉ. जतिंद्र सिंह होरें एहदे पर खुशी जाहिर करदे होई आखेआ जे रेल मंत्री अश्विनी वैश्वणव हुंदे आसेआ इस मामले च आपूं दखल देने दे बाद सुधार आहली एह प्रक्रिया तोड़ चढ़ी सकी ऐ। तोआई, इक्क होर बड़्डी खबर सांझी करदे होई डॉ. सिंह होरें इब्बी आखेआ जे उधमपुर ब्हाई अड्डे थमां बड़ी तौलें गै नागरिक डोआरिएं दी बवस्था शुरू करी दिती जाग ते एहदे लेई लोइचदे सब्बै बंदोबस्तें गी मुकदा रूप दिता जा करदा ऐ। उनें इब्बी आखेआ जे इस गेंs कन्नै उधमपुर जिले लेई संपर्क ते विकास बाददे दे नमें मौके पैदा होडन। केंद्री मंत्री होरें इब्बी आखेआ जे एह पैहलकदमी औक्कड़ी प्राथमिकता गी बी दर्शादी ऐ जेड़ी प्रधानमंत्री नरेंद्र मोदी हुंदे आसेआ इस खिते गी दिती जंदी ऐ।

<><><><><><>

Recruitment-Rally

पुंछ जिले दे मकामी युवाएं गी सशक्त बनाने दे मकसद कन्नै इक बड़्डे आउटरीच पैहलकदमी तैहत भारती सेना नै साब्जियां ग्रांs च दो दिनें दी पोर्ट्स भर्ती रैली दा आयोजन कीता। इस रैली च मकामी युवाएं बड़े जोश ते उत्साह कन्नै हिस्सा लैता ते भारती सेना च पोर्टर नौकरियें लेई अपने आप गी पंजीकृत कराने आस्तै मती गिनतरी च हाजर होए। भर्ती अभियान ना शड़ा रोजगार दे मौके हासल करोआंदा ऐ, सगुआं सेना ते मकामी लोकें बशकार रिश्ता बी मजबूत करदा

ऐ। मकामी लोकें इस रैली लेई सेना दा आभार जताया। इस रैली च हिस्सा लैने आहले इक प्रतिभागी नै आखेआ।

<><><><><><>

Ramban-Ambulances

14 अगस्त गी जदूं किशतवाड़ दे चशोती ग्रांs च बददल फट्टने करी इक विनाशकारी त्रासदी होई, उस दरान इस त्रासदी गी दिखदे होई जिला रामबन दे मेडिकल मैहकमे नै फौरन एम्बुलेंस दे जरिए अपनी आपात सेवां दितियां। उसी दिन रामबन थमां एम्बुलेंसां भेजियां गेइयां तां जे घायलें, पीड़ितें गी होर इलाज लेई जाया जाई सकैं। रामबन दे मेडिकल मैहकमे नै बनकदे हालात च कम्म करना जारी रक्खेआ ते घायलें गी सुरक्षित थाहरें उप्पर पजाना जारी रक्खेआ। आकाशवाणी जम्मू कन्नै गल्लबात करदे होई चीफ मेडिकल ऑफीसर रामबन कमलजी जद्दू होरें आखेआ।

<><><><><><>

Samba-HRD

जिला साम्बा दे ब्लॉक विजयपुर दे ग्रांs छन्नी मन्हासा च 2 दिनें दा मानव संसाधन विकास कार्यक्रम दा आयोजन कीता जा-रदा ऐ। इस कार्यक्रम दा आयोजन भारत सरकार दे राई-बाई ते करसान कल्याण मंत्रालय दे बूहटे सरबन्धी संरक्षण, quarantine ते स्टोरेज निदेशालय दे तैहत Central Integrated pest Management Centre, Jammu आसेआ कीता गेआ ऐ। इस कार्यक्रम करसानें, मकामी लोकें ते अधिकारियें हिस्सा लैता। इस मौके पर CIPMC Jammu दे डिप्टी कमिशनर डायरेक्टर डॉ. एम.के आर्या होरें Integrated Pest Management बारै इक विस्तृत जानकारी दिती। उनें आखेआ।

<><><><><><>

Weather

मौसम मैहकमे नै औने आहले दिनें च भारी बरखा ते हाड़ औने दी पेशगोई कीती ऐ। आकाशवाणी जम्मू दे संवाददाता दी रिपोर्ट मूजब 22 अगस्त गी रातीं जम्मू, रियासी, उधमपुर, राजौरी, कठुआ ते साम्बा च बक्ख-बक्ख थाहरें भारी बरखा होने दी मेद ऐ। जम्मू-कश्मीर दिएं बक्ख-बक्ख थाहरें उप्पर 23 थमां 26 अगस्त बश्कार मती थमां भारी बरखा, जिसलै के कई थाहरें पर हल्की थमां दरम्याने दर्जे दी बरखा पौने दी मेद ऐ। इस दरान मौसम करी जिनें थाहरें उप्पर असर पौने दी मेद ऐ, उन्दे च जम्मू, रियासी, उधमपुर, साम्बा, कठुआ, अनंतनाग, कुलगाम, पुंछ, रामबन, डोडा ते किशतवाड़ शामिल न।

<><><><><><>